

RI SAMAJ QUICHIN RI CH'AKA' CHIC VINAKI'

Quere' c'a xubij ri Jesús: "Ja yin in c'o chi'icojol achi'el ri nilin" (Lucas 22:27). Vi can nikatzekebej ri Jesucristo, nic'atzin chi yekasamajij ri ch'aka' chic vinaki'.

Yekasamajij ri ch'aka' chic vinaki' tok yekato' riq'uin ri nic'atzin chique. Vi yekasamajij ri ch'aka' chic vinaki' achi'el ri xuben ri Jesús, nic'atzin c'a chi c'o ri ajovabel pa kánima y chi can nikarayij yekato'. Ri ajovabel man xaxe ta jun na'oj pa kánima. Tok yekajo' ri ch'aka' chic, nikarayij yekato' chuka'.

Nic'atzin chi konojel yekasamajij ri ch'aka' chic vinaki'. Ch'aka' niqubij chi xaxe ri e meba'i' ye'ilix o xaxe ri vina-ki' ri manek quik'ij. Ch'aka' niqubij chi xaxe nic'atzin chi ri beyon tak vinaki' yequisamajij ri ch'aka' chic. Man que ta ri' xubij ri Jesús. Jun k'ij jun ixok xuc'utuj chire ri Jesús vi c'a xtuya' quik'ij ri ral chupan ri rajavaren ri Dios. Ri Jesús quere' xubij chire: "Ri achique chive rix xtunimirisaj ri', rija' xtoc isamajel. Y ri xtajovan xtoc nabey chicojol, jari' ri xtoc isamajel" (Mateo 20:26-27).

ACHIQUE MODO YEKASAMAJIJ RI CH'AKA' CHIC VINAKI'

Q'uiy rubeyal richin yekasamajij ri ch'aka' chic vinaki'. C'o modo yekato' ri ch'aka' chic riq'uin ronojel ri nic'atzin chique. C'o modo nikaya' puek o tziek o vey chique ri vinaki' ri nic'atzin chique re utzil re'. Utz chuka' yojoc rachibil jun chic vinek. Utz yekaben cuenta ri rijitek tak vinaki' y ri yava'i'. C'o chuka' modo nikatijoj jun chic vinek chire ri utzilej rutzijol. Vi jun vinek nibison, utz nikacukirisaj ruvech.

C'o chuka' modo nikaben ch'uti'k tak samaj quichin ri ch'aka' chic y man xaxe ta ri nima'k tak samaj. Man utz ta vi man nikato' ta jun chic vinek roma man yojtiquir ta nikaben jun nima samaj. Jun k'ij ca'i' ac'uala' xebe chira-choch jun malca'n ixok y xquiya' jun ca'i' oxi' vey chire. C'a c'ari', xquibij chire chi c'o modo niquibebana' na xabachique mandado ri nic'atzin chire. Ri malca'n ixok janila xquicot roma ri utzil ri xquiben chire y re' man xumestaj ta.

Man riq'uin vi ri', c'o chuka' bey nic'atzin chi nikaben jun nima samaj chire jun chic vinek. Ri Ajaf xuya' ri ruc'aslen richin queri' xojrusamajij.

Tac'utuj chire jun chic chi tutzijoj achique modo xto'ox roma ri jun chic vinek chuto'ic. Tac'utuj chique ri ch'aka' chic chi tiqubij achique xtiqubien chiquito'ic ri ch'aka' chic vinaki'.

RI AJAF NURAYIJ CHI YEKASAMAJIJ RI CH'AKA' CHIC VINAKI'

Ri rusamaj ri Dios nibanatej tok ri achi'a' y ri ixoki' y ri ac'uala' yequito' ri ch'aka' chic vinaki'. Ri Presidente Spencer W. Kimball quere' xubij: "Ri Dios can retaman vi ri yekaben, y rija' yojrutz'et. Man riq'uin vi ri', janila mul yojruto' riq'uin ri achique nuben jun chic vinek."

Nic'atzin chike ri to'onic ri niquiya' pe ri ch'aka' chic vinaki'. Tok roj c'a oj ac'uala' na, ri kate' katata' xquiya' ri katziak y ri kavay y xojquichajij. Vi man ta queri' xquiben, xojcom ta. Tok yojnimer juba', ch'aka' chic vinaki' xojquiti-joj chique jalajoj ruvech samaj y nojibel. Ch'aka' nic'atzin chique chi ye'ilix tok yeyavej o tok manek quipuak. C'o bey nikac'utuj el chire ri Dios chi tuto' na jun chic vinek, pero roj xa manjun nikaben chuto'ic. Nic'atzin c'a chi man tikamestaj ta chi ri Dios nuben ri rusamaj riq'uin ri achique nikaben roj. Y vi manjun nikaben, man xtibanatej ta ri rusamaj rija'.

Tok roj nikato' ki', nikato' chuka' ri Dios. Chupan ri Vuj richin ri Mormon, jun utzilej achin rubini'an Benjamin xerutijoj ri ruvinak chi nic'atzin chi niquito' qui'. Rija' chuka' xeruto' ri ch'aka' chic vinaki'. Rija' xerusamajij ri ruvinak chijun ruc'aslen. Xuch'ec ri ruc'aslen y man xuben ta chi ri ruvinak xquitoj, ni ta chuka' xquiliij. Jun k'ij rija' xtzijon qiq'uin ri ruvinak, y xubij chique achique roma tok janila

xrajo' xeruto' ri ch'aka' chic. Quere' c'a xubij: ". . .tok yixsamej coma ri ch'aka' chic vinaki', ja ri rusamaj ri Dios niben. . . .Y vi yin, ri achojche' nibij vi rix chi in rutata'al ri itinamit, can yisamej vi ivoma rix, ¿la man ta cami ruc'a-mon chi rix nisamajij ivi' chuka'?" (Mosia 2:17-18).

Tasiq'uij c'a ruvech ri Mateo 25:40.

¿Achique roma nurayij ri Ajaf chi yekato' ri ch'aka' chic vinaki'?

¿La nic'atzin cami chire rija' chi yekato' ri ch'aka' chic?

¿Achique c'a ri más nic'uluman tok roj yekato' ch'aka' chic vinaki'?

RI TURUSANIC E PETENEK TOK YEKATO' RI CH'AKA' CHIC

Tok roj yekato' ri ch'aka' chic vinek, nikil utzilej tak turusanic. Tok yekato' ri ch'aka' chic vinaki', más yekajo'. Man can ta chic nikacanoj ri nic'atzin xaxe chike roj. Tok nika-ch'ob rij ri quic'ayeval ri ch'aka' chic, man can ta nikatij pokon roma ri kac'ayeval roj. Nic'atzin chi yekato' ri juley chic vinaki' vi nikarayij nikil ri c'aslen richin jumul. Ri Dios rubin can chi ri vinaki' ri e c'o acuchi c'o vi rija', c'o chi yekajo' y yekato' conojel ri ralc'ual (tatz'eta' c'a ri Mateo 25:32-46 y ri Romanos 12:1-2).

Utz nikach'ob quij ri yeto'on quichin ri ch'aka' chic vinaki'. Más nim niquil chuvech ri achique niquiya' chique ri ch'aka' chic. Jun k'ij c'o jun achin rubini'an Pablo ri c'o 20 rujuna' Xek'aj che ca'i' raken y ri ak'omanel c'o chi xerukupij el. Vi ta queri' xkaben roj, riq'uin juba' xpe ta koyoval chire ri Dios y man ta jun samaj xkaben. Pero ri Pablo xuch'ob quij ri ch'aka' chic vinaki' y man xpe ta royoval. Xretamaj jun chic samaj y riq'uin re' xuch'ec juba' rupuak. C'a c'ari', xulok' jun jay. Chiri' rija', riq'uin ri rixjayil, xeruchajij ri tak ac'uala' ri manek cachoch. C'o ch'aka' ac'uala' ri e yava'i', o e jetz'i', o e moyi'. Ri Pablo xeruto' re tak ac'uala' re' chijun ruc'aslen. Ri vinaki' janíla xcajo' ri Pablo y rija' man xbison ta chic roma ri manek chic raken. Can xjel vi apon riq'uin ri Ajaf.

Tac'utuj c'a chique ri ch'aka' chic chi tiquitzijoj ri turusanic ri yekac'ul tok yekato' ri juley chic vinaki'.

¿Achique roma niq'uiyer ri kajovabal tok yekato' ri ch'aka' chic.

¿JAMPE' YEKATO' RI CH'AKA' CHIC VINAKI'?

C'o bey yekato' xaxe ri vinaki' ri yekajo' y yekaxilk'otij ri ch'aka' chic. Pero ri Jesús xubij chi quekajo' conojel ri vinaki' y quekato'. E c'o janíla rubeyal richin yojtiquir yekasamajij ri ch'aka' chic vinaki'.


Utz yekato' ri ka familias. Ri achijilonel nic'atzin chi rija' nretamaj achique ri nic'atzin chire ri rixjayil. Nic'atzin chuka' chi ri ixjayilonel nretamaj achique ri nic'atzin chire ri rachijil. Ri te'ej tata'aj man xaxe ta nic'atzin chi yequillij ri calc'ual y niquiya' quitziak, xa nic'atzin chuka' chi yequiti-joj, y chuka' chi ye'etzan quiq'uin, y yesamej quiq'uin. Ri ac'uala' utz yeto'on pa jay. Utz niquito' ri quite' pa jay y yequitz'et ri tak quichak'.

Vi jun ixjayilonel janíla cosinek, utz vi ri rachijil nuchajij juba' ri ti ne'y. Utz chuka' chi ri ixjayilonel nuben jun utzilej va'in richin ri rachijil. Ri te'ej tata'aj utz vi man niquilok' ta ri nicajo' rije', xaxe richin chi ri alc'ualaxel nitiquir xtibe pa jun ru misión. Jun ala' utz nucukirisaj ránima jun ru-chak' vi nuxibij ri' chuvech ri k'eku'm. Chuka' utz chi nuti-joj juba' chutz'etic ri vuj. Ri profeta'i' quibin can chi ri familia nic'o ruvi' c'atzinel chuvech ronojel molaj vinek. Nic'atzin c'a chi yekasamajij ri ka familia (tatz'eta' c'a ri Mosia 4:14-15).

Q'uiy mul c'o modo yekato' ri ch'aka' chic vinaki'. Vi jun ka vecino manjani tuben ruk'atoj, vi ta nipe nim cak'ik', utz nikato' chubanic ri ruk'atoj. Vi jun te'ej xa niyavej, utz yekachajij ri tak ral o nikato' riq'uin ri rusamaj pa jay. Vi jun ala' man cof ta c'o chupan ri K'ataj, utz nikayukej pe richin queri' xtic'oje' chic cof chupan. Vi jun ac'ual nitzi'ex coma ri ch'aka' chic, roj c'o modo nikabochi'ij y nikabij chique ri ch'aka' chi tiquibana' ri utz chire. Man nic'atzin ta chi ketaman chic ruvech jun vinek richin chi nikato'. Xa nic'atzin chi nikatij kak'ij chiquito'ic ri ralc'ual ri Dios cono-jel janipe' ri yojtiquir.

Vi c'o jun ri can yojtiquir nikaben, ruc'amon c'a chi yekasamajij ri ch'aka' chic vinaki' y chuka' ri tinamit. Ri Dios nuya' kuchuk'a' y ketamabal richin xquekato' ch'aka' chic vinaki'.

C'o bey niya'ox k'ij chike richin yojsamej chupan ri K'ataj. Ri ruchojmilal ri K'ataj nuya' k'ij chike richin nikato' ki' chupan. Nikato' ki' chupan ri K'ataj tok nikach'abalij ri utzilej rutzijol chique ri ch'aka' chic. C'o bey yojoc uc'uey bey. Utz yekak'ejela' ri ch'aka' chic vinaki' ri e c'o chupan ri K'ataj. Y c'o chuka' ch'aka' chic samaj ri utz nikaben chupan ri K'ataj. Chupan ri Ruk'ataj ri Jesucristo quichin ri



Chojlaxela' chupan ri Ruq'uisibel tak K'ij manek samajela' ri e tojon. Romari' nic'atzin chi roj nikaben ri samaj chupan ri K'ataj.

Tabij chique ri vinaki' chi tiqitz'ibaj chuvech jun vuj achique modo xtiquito' ri qui familia y chuka' jun chic vinek. Tabij chique chi tiquiya' ri vuj ri' acuchi yetiquir niqitz'et k'ij richin queri' man xtiqimestaj ta.

RI CRISTO NUK'ALAJIRISAJ CHIKAVECH ACHIQUE RUBEYAL RICHIN YEKASAMAJIJ RI CH'AKA' CHIC VINAKI'

Ri Colonel xuc'ut chikavech achique rubeyal richin yekasamajij ri ch'aka' chic vinaki'. Xubij chi rija' xpe chuvach'ulef chiquito'ic ri ch'aka' chic vinaki'. Rija' man xpe ta richin nito'ox, xa xpe chuya'ic ruc'aslen koma. (Mateo 20:28)

Janíla yojrajo' ri Jesús. Man nik'ax ta chikavech ri rajovabal rija'. Tok rija' xc'oje' chuvach'ulef, xeruto' ri meba'i' y ri aj maqui'. Xeruto' chuka' ri vinaki' ri man utz ta quinojibal y chuka' ri yeyok'. Xuch'abalij ri utzilej rutzijol chique conojel ri xcajo' xcac'axaj. Xerilij nimalej tak molaj vinaki' ri xe'apon riq'uin churac'axaxic. Xeruc'achojirisaj ri yava'i', y xeruc'asoj ri caminaki'.

Ja rija' ri Kajaf, ri ka Dios, y ri Kacolonel. Man riq'uin vi ri', rija' xuch'utinirisaj ri' y xsamej coma ri ch'aka' chic. Tok juba' chic man nuc'uex el pa camic, rija' xuben jun molojri'il quiq'uin ri ru apostoli' y xerutijoj. C'a c'ari', xuchop jun yacbel ya' y jun tziek. C'ari' xuch'ej ri caken ri ru apostoli'. (Juan 13:4-10). Chupan ri k'ij ri', vi xach'ej ri raken jun chic, jari' nibec'ulun chi naya' ruk'ij ri vinek ri'. Ja ri samajela' ri xech'ajon ri caken ri cajaf. Ri Jesús xuben re' roma xerajo' ri ru apostoli' y xrajo' xerusamajij. Tok yekato' chi utzil ri ch'aka' chic vinaki' riq'uin ajovabel, yojoc junan riq'uin ri Cristo.

Tabij chique oxil' vinaki' chi tiquicanoj re mocaj re' y tiqitzijoj na ri xuben ri Colonel coma ri ch'aka' chic vinaki': Juan 13:4-10 (xuch'ej ri caken); Mateo 15:30-31 (yeruc'achojirisaj ri yava'i'); Mateo 15:32-38 (xerutek 4,000 vinaki').

CH'AKA' CHIC MOCAJ RI UTZ YE'ANIC'OJ

Mosia 2 (ri Benjamin nitzijon pa rivi' ri samaj ri nikaben coma ri ch'aka' chic)

DyC 81:5 (que'ato' ri ch'aka' chic y taya' cuchuk'a')

Colosenses 3:23-24 (tabana' samaj coma ri ch'aka' chic vinaki' achi'el vi ta rusamaj ri Ajaf naben)

Gálatas 5:13 (tito' c'a ivi' riq'uin ajovabel)

Mateo 25:40 (tasamajij ri vinek ri manek ruk'ij achi'el vi ta ri Jesús nasamajij)

Juan 13:15-16 (ri Jesús xuc'ut chikavech achique rubeyal richin yekato' ri ch'aka' chic vinaki')

JUN BIX RI UTZ NABIXAJ

"Riq'uin Ronojel Kánima"

RI PIXA' RICHIN KARAXNAKIL RI NUYA' PE RI AJAF

Jun nimalej turusanic ri xya'ox pe chike tok xojpe chuva-ch'ulef ja ri kach'acul. Nic'atzin chike jun kach'acul richin chi c'o modo yojoc junan riq'uin ri Katata' c'o chila' chicaj. Ri kach'acul janíla e c'atzinel y romari' ri Ajaf nubij lok'olej jay (templo) chire (tatz'eta' ri 1 Corintios 3:17). Ri kach'acul e lok'olej. Ri kach'acul can c'atzinel vi, y romari' ri Katata' nurayij chi nikachajij. Rija' retaman chi más yojquicot vi oj raxinak. Retaman chuka' chi yojoc utzilej tak vinaki' vi oj raxinak. Vi ch'ajch'oj ri kach'acul, ri Espiritu richin ri Chicajel Katata' c'o kiq'uin. Ri Katata' retaman chi ri itzel vinek yojruk'ol richin nikatij ri man utz ta y richin man nikachajij ta chi utzil ri kach'acul. Romari' rija' xubij chike achique ri utz nikatij y achique ri man utz ta. Ri achique xubij ri Dios chike pa ruvi' ri karaxnakil tz'ibatel can chupan ri tanaj 89 richin ri Doctrinas y Convenios. Re k'alajirisanic re' rubini'an ri Ch'abel richin Etamabel.

Nic'atzin chi nikatakej ri Ch'abel richin Etamabel richin queri' ruc'amon richin yojoc chupan ri lok'olej nimajay richin ri Ajaf. Vi man nikatakej ta ri Ch'abel richin Etamabel, ri Espiritu richin ri Ajaf man c'o ta kiq'uin. Ri kach'acul, jari' ri ru templo ri Dios. Vi nikatz'ilobisaj ri kach'acul, xa xtikaben ri itzel chire ri ka espíritu y chuka' chire ri kach'acul.

Tasiq'uij c'a ruvech ri DyC 89.

RI AJAF XUBIJ CAN CHIKE CHI E C'O RI MAN UTZ TA RICHIN NIKATIJ

Ri Ajaf nubij chike chi man tikatij ri vino y ri ch'aka' chic k'abarisanel tak ya'. Ri Presidente Heber J. Grant xubij chi ri k'abarisanel ya' nuq'uen pe ri itzel na'oj chupan ri ka

familia y chuka' nuben chi ri vinaki' niquisech quipuak y yeyavej. Chuka' c'o bey nuben chi ri vinaki' niquitz'uc tzij, y ye'ixokin, y niquisech quina'oj. Ri k'abarisanel ya' xa jun etzelanic chique conojel ri yetijon richin. Vi jun ixok yava' chirij jun ac'ual y nutij ya', nuya' ruyabil ri ruch'acul y chuka' ri runojibal ri ral. Tok jun vinek nik'aber, man utz ta nisamej y man utz ta ninojin. Nusoc ri' rija' y c'o bey chuka' nusoc jun chic vinek. Ri Ajaf xubij chuka' chi ri sic' xa man utz ta chire ri kach'acul (tatz'eta' c'a ri DyC 89:8). Ri sic' nutz'ilobisaj ri kach'acul y chuka' ri ka espíritu. Man utz ta yojsic'an, ni ta chuka' nikaquech' ri may. Ri achi'a' etamanela' quinaben chi ri sic' nuya' ri c'ayef tak yabil y chuka' nuya' ruyabil ri ti ne'y ri manjani que'alex.

Ri Ajaf chuka' yojrupixabaj chi man tikatij ri uq'uiya' e k'ak'. Ri e uc'uey kabey chupan ri K'ataj quibin chi ri uq'uiya' ri e k'ak', jari' ri café y chuka' ri té. Nic'atzin c'a chi man quekatij xabachique uq'uiya' ri niquiya' yabil chike.

Ri Ajaf rubin chique ri profeta'i' ri e c'o vacami chi man utz ta nikatij jun ak'om vi man nic'atzin ta richin yojc'achojir che ri yabil. Ri Presidente Spencer W. Kimball xubij chike chi vi nikatij ri itzel tak ak'om, jari' q'uiy mul más itzel chuvech ri k'abarisanel ya'. Xubij chi vi jun vinek nutij jun itzel ak'om y xa man nic'atzin ta chire, ri vinek ri' c'o chi nitzolin pe ruc'u'x.

Nic'atzin chi man nikatij ta manjun achique ri nuben ri itzel chire ri kach'acul. Yalan itzel vi nikasic'aj ri Marihua-na. Chuka' man utz ta nikatij ri achique yojru chop y nuben chi man yojtquir ta nikatanaba' rutijic. Ri Ch'abel richin Etamabel man nunuc' ta rubixic ronojel achique ri man utz ta richin nikatij. Xa nuc'ut chikavech jun rubeyal ri utz nikatzekelbej. Re pixa' re' can utz vi chire ri kach'acul y chuka' chire ri ka espíritu. Tok nikatakej ri Ch'abel richin Etamabel, niya'ox uchuk'a' chire ri ka espíritu. Chuka' nikach'ajch'ojirisaj ri kach'acul, richin queri' ri Espiritu richin ri Ajaf nic'oje' kiq'uin.

Tatzijoj c'a achique ri man utz ta nikatij.

¿Achique roma tok man utz ta nikatij ronojel re'?

C'O RI ACHIQUE CAN UTZ VI CHIRE RI KACH'ACUL

Ri ruvech tak che' y chuka' ri ichaj can utz vi chire ri

kach'acul. Ruc'amon chi nikatij riq'uin utzilej nojibel y chi nikamatioxij chire ri Dios roma ruya'on pe chike.

Utz chuka' nikatij ri ti'ij quichin ri chicopi' y chuka' ri aj xic' chicopi'. Man riq'uin vi ri', nic'atzin chi man q'uiy ta ti'ij nikatij (tatz'eta' ri DyC 89:12, 49:18). Utz nikatij ri quer chuka'.

Utz nikatij ri quivech ri trigo, ri avena, y ri ch'aka' chic achi'el re'. Ri trigo can utz vi chike. Utz nikaben uq'uiya' chire y ch'aka' chic. Ronojel ri nibix granos chique, jari' utz richin nikatij.

¿Achique xubij ri Ajaf chupan ri Ch'abel richin Etamabel chi utz yekatij?

NIC'ATZIN CHI YOJSAMEJ Y YOJUXLAN Y YOJCH'AJON

Man xaxe ta ri Doctrinas y Convenios 89 nubij ri achique modo xtilil utzilej karaxnakil. Ri lok'olej tak tz'ibanic chuka' niquibij quere': Man chic quixk'oran. Man chic quixoc tz'il. Man quixver más chuech ri nic'atzin chive. Quixver ka c'a loman richin chi man ta yixcos. Quixyacatej jucumaj richin queri' utz xtuna' ri ich'acul y chuka' ri inojibal (tatz'eta' c'a ri DyC 88:124). Chuka' xbitej chike quere': Casamej c'a vaki' k'ij y tabana' ronojel ri asamaj (tatz'eta' ri Exodo 20:9). Ri Ajaf yojrupixabaj chi man c'a tikaben janíla chuech ri yojtquir nikaben (tatz'eta' c'a ri DyC 10:4).

Jun profeta chupan re k'ij re' rubini'an Joseph F. Smith quere' xubij; Nic'atzin chi ri vinaki' niquiben ri choj richin queri' utz ri quiraxnakil. Nic'atzin c'a chi nikajik'a' utzilej cak'ik' y chuka' chi yojsamej y yojatin binakel chupan ch'ajch'oj ya'.

¿Achique roma nic'atzin chi yojsamej y yojch'ajon y yojuxlan?

C'O TURUSANIC RI NIKAC'UL TOK NIKATAKEJ RI PIXA' RICHIN KARAXNAKIL RI XUYA' PE RI AJAF

Ri Katata' chila' chicaj ruya'on pe jun rupixa' richin queri' xtiketamaj achique rubeyal richin utz nikachajij ri kach'acul. Ri lok'olej tak tz'ibanic niquic'ut chikavech achique rubaniquil ri rupixa' ri Dios. Quere' c'a nubij ri Ajaf: Man jun pixa' aj ruvach'ulef xinya' can chique rije'. Roma chironojel ri nupixa' e richin ri espíritu (tatz'eta' c'a ri DyC 29:35). Jare' nibec'ulun chikavech chi vi ri Dios nuya' jun



pixa' pa ruvi' ri rutzil kavech, xa can nic'atzin vi chire ri ka espíritu chuka'.

Tok roj nikatakej ri pixa' richin karaxnakil ri xuya' pe ri Ajaf, rija' yojruturusaj. Vi yekatakej ri rupixa' ri Ajaf, rija' yojruturusaj riq'uin ri nic'atzin chire ri kach'acul y chuka' riq'uin ri nic'atzin chire ri ka espíritu.

Rija' nubij chike chi xtikil utzilej karaxnakil. Vi nikatakej ri Ch'abel richin Etamabel, xkojanin y man xkojk'itej ta (tatz'eta' c'a ri DyC 89:20). Jare' jun nimalej turusanic. Man riq'uin vi ri', más nim ri turusanic richin ri espíritu chuvech ri turusanic richin kach'acul.

Ri Ajaf quere' nubij pe: Ri Cholaxela' xtiquil chuka' utzilej nojibel y nima'k tak beyomel richin etamabel, ja' ri etamabel ri can evan vi (tatz'eta' c'a ri DyC 89:19). Ri Uxlabixel xtuk'alajirisaj nimalej tak tijonic chikavech. Ri Ajaf nubij chike chuka' chi ri yojonel ángel xtik'ax chikavech y man xkojrucamisaj ta. Ri Presidente Spencer W. Kimball xubij chi re' nel chi tzij chi xkojcolotej pe chupan ri camic richin ri espíritu. "Vi nikatakej ri Ch'abel richin Etamabel, ri rajel xtikil, jari' ri c'aslen. Man xaxe ta ri' ri c'aslen vave' chuvech re ruvach'ulef, xa chuka' xtikil ri c'aslen richin jumul" (*El Milagro del Perdón*, p.211).

¿Achique cami ri turusanic richin jumul ri nikil tok nikatakej ri Ch'abel richin Etamabel? Tac'utuj c'a chique ri vinaki' chi tiqitzijoj chiquicojol achique rubeyal richin xtiqitakej jumul ri Ch'abel richin Etamabel.

CH'AKA' CHIC MOCAJ RI UTZ YE'ANIC'OJ

1 Corintios 3:16-17 (ri ch'aculaj jari' ri rachoch ri Dios)

Jueces 13:13-14 y ri Proverbios 20:1 y ri Isafás 5:11-12 y ri Daniel 1 (man tatij ri K'abarisanel ya')

DyC 59:16-20 (ri c'o chuvach'ulef xyatej pe chuto'ic ri vinek)

Proverbios 23:20-21 (yojrupixabaj chi man koj'aber y man koj'oran)

JUN BIX RI UTZ NABIXAJ

"Ri Nata' Xuya' Jun Nuch'acul"

RI AJOVABEL

Ri ruc'aslen ri Ajaf nuk'alajirisaj chikavech chi rija' can yerajo' vi conojel ri vinaki'. Rija' xuya' ri ruc'aslen koma roj. Ri ajovabel ri yojch'o chirij, jari' ri ch'ajch'oj ajovabel richin Jesucristo. Rija' xubij chike chi tikajo' ki' achi'el rija' oj rajovan. Ri lok'olej tak tz'ibanic niquik'alajirisaj chikavech chi ri ajovabel c'o pa kánima. Roj kac'uan ri ajovabel tok yekajoyovaj quivech conojel ri kach'alal riq'uin ronojel ri kánima (tatz'eta' c'a ri 1 Juan 3:16-24).

¿Achique camí ri ajovabel?

RI AJOVABEL JARI' JUN UTZILEJ NA'OJ RI CAN NIM VI

Quere' xubij can ri profeta Moroni: "Roma c'ari', titunuba' ivi' riq'uin ri ajovabel ri can janíla vi nim chuvech ronojel, roma ronojel xa c'o chi niq'uis. Jac'a ri ajovabel jari' ri ch'ajch'oj rajovabal ri Cristo y can nicoch'on vi benek ruvech" (Moroni 7:46-47).

Ri ruc'aslen ri Ajaf nuc'ut chikavech jun rubeyal ri utz nikatzekelbej. Rija' jun tz'aket achin. Ruc'uan jun ch'ajch'oj ajovabel y xuk'alajirisaj chikavech achique modo utz yojajovan. Riq'uin ri xubanala' rija', xuc'ut chikavech chi c'o ri nic'atzin chique ri ch'aka' chic vinek y man xaxe ta chike roj. Tok manjani ticom koma roj, quere' xubij: "Jare' nupixa': Tivajovala' ivi', achi'el yin ix vajovan. Manjun c'o ta más nim rajovabal que chuvech re', chi jun xtuya' ruc'aslen coma ri rachibil" (Juan 15:12-13).

Ri Moroni xch'o riq'uin ri Ajaf y quere' xubij: Nokaka chinuc'u'x chi rat xabij chuve chi janíla e avajovan ri vinaki' chuvach'ulef. Y roma c'ari' tok xaya' ri ac'aslen coma ri vinaki' ri e c'o chuvech re ruvach'ulef. Y vacami yin veta-



man chi re ajovabel re' ri naya' chique ri calc'ual ri achi'a' jare' ri ch'ajch'oj ajovabel. Que c'ari', vi ri vinaki' man quic'uan ta ri ajovabel, xa man xtiquichinaj ta ri c'ojlibel ri a banon coma chupan ri rachoch ri Atata' (tatz'eta' c'a ri Eter 12:33-34).

Riq'uin juba' man nirayix ta chi nikaya' can ri kac'aslen achi'el ri xuben ri Colonel. Man riq'uin vi ri', c'a c'o na modo richin nikil ri ajovabel vi nikajiquiba' pe ri kac'aslen riq'uin rija' y nikaben ri xubila' y ri xubanala'. C'o c'a chuka' modo richin yekato' ri kach'alal achi'el ri xuben ri Colonel.

¿Achique roma nikabij chi ri ajovabel jari' jun utzilej na'oj ri janíla nim?

¿Achique roma tok yalan c'atzinel chi nikil ri ajovabel?

VI C'O KAJOVABAL, XQUEKATO' NA RI YAVA'I' Y RI JULEY CHIC VINAKI' RI NIQUITIJ POKONAL.

Q'uiy mul ri Ajaf xutzijoj tak tzijonic richin queri' xojrutijoj. C'o jun tzijonic rubini'an ri tzijonic chirij ri Utzilej Samaritano. Jun Samaritano jari' jun vinek aj Samaria. (Lucas 10:30-37; tatz'eta' c'a chuka' ri vuj rubini'an *Jesús el Cristo*, pp. 454-456). Re tzijonic re' nuk'alajirisaj chikavech chi nic'atzin chi yekato' ri ch'aka' chic vinaki' stape' man kavinakul ta roj. Ri Ajaf xubij chi c'o jun achin ri nibe pa jun chic tinamit. Riq'uin juba' ri achin ri' jun judío. Chek c'ate', xchap coma elek'oma'. Rije' xquelek'aj el ri rutziak y ri rupuak. C'a c'ari', xquich'ey y xquisoc. Y xquiya' can chuchi' ri bey. Rija' juba' man xcom. C'a c'ari', xk'ax jun chic judío y rija' jun uc'uey bey chupan ri k'ataj. Pero rija' xaxe xutzu' can ri jun chic, y xuchop chic binen y man xuto' ta. Xk'ax jun chic achin. Rija' chuka' jun judío y rija' jun samajel chupan ri templo quichin ri e judíos. Ri achin ri' xutz'et ri socotajinek y xapon riq'uin. C'a c'ari' xuchop chic binen y chuka' man xuto' ta. C'a c'ari', jun achin aj Samaria xapon riq'uin ri achin. Ri vinaki' aj Samaria e etzelan coma ri judíos. Man riq'uin vi ri', tok ri achin ri' xutz'et ri judío chi socotajinek, janíla xujoyovaj ruvech. Xuque' chunakaj ri achin y xuya' ak'om chire. C'ari', xujotoba' chirij ri ruquiej y xuc'uaj pa jun posada. Xutoj c'a ri rajaf ri jay ri' richin chi xuchajij ri achin socotajinek, c'a jampe' xc'achoj.

Ri Jesús xubij chi tikaya' quivay ri vinaki' ri manek quivay.

Chuka' xubij chi quekato' ri vinaki' ri manek cachoch y tikaya' tziek chique ri vinaki' ri manek quitziak. Nic'atzin chuka' chi yekak'ejela' ri yava'i' y ri vinaki' ri e tz'apel pa che'. Tok nikaben quere', achi'el vi ta chire ri Ajaf nikaben vi. Rija' nubij chike chi xtikichinaj ri rajavaren vi quere' xtikaben. Man riq'uin vi ri', vi yekaxilk'oltij ri yava'i' y ri e tz'apel pa che' y ri vinaki' ri nic'atzin quivay o quitziak, ja c'ari', xa achi'el vi nikaxilk'otij ri Jesús (tatz'eta' c'a ri Mateo 25:34-46). Man nikach'ob ta vi jun vinek ruc'amon richin nikato' juba' (tatz'eta' c'a ri Mosía 4:16-24). Nabey nikil ri nic'atzin chique ri ka familia. C'a c'ari', yekato' conojel ri vinaki' ri e meba'i'. Riq'uin c'ari', xtikaben achi'el ri Katata' chila' chicaj. Rija' nuben c'a chi nikaka' pe ri job pa quivi' ri utzilej tak vinek y chuka' pa quivi' ri itzel tak vinaki' (tatz'eta' c'a ri Mateo 5:44-45).

Chupan re juna' re', ri Presidente Harold B. Lee runatan chike chi ch'aka' chic vinaki' man xaxe ta ri vey o ri tziek nic'atzin chique. Quere' c'a xubij: "Utz noka' chikac'u'x chi e c'o vinaki' chikacojolil ri paxinek quic'u'x y socotajinek ri cáñima. Nic'atzin c'a chique jun cach'alal ri xqueruchajij y xquerupokonaj."

Tac'utuj chire jun chic chi tutzijoj ri tzijonic chirij ri Utzilej Samaritano (tatz'eta' c'a ri Lucas 10:30-37).

Catzijon c'a juba' chiquij ri vinaki' ri xek'ax y man xquito' ta ri achin ri socotajinek. Y catzijon c'a chuka' chirij ri achin aj Samaria ri xuto'.

RI AJOVABEL PETENEK C'A CHUPAN RI KANIMA

Ri Apóstol Pablo xubij chi vi yekato' ri vinaki' ri c'o nic'atzin chique, pero man nikajoyovaj ta quivech, c'ari' xa manek kajovabal (tatz'eta' c'a ri 1 Corintios 13:3). Rija' xubij chi tok c'o kajovabal, xaxe ri utz nikanojij chiquij ri nic'aj chic vinaki'. Nikaben ri utz, y man cha'nin ta nipe koyoval. Man nikabananej ta ki' y man nikanimirisaj ta ki'. Man nikacanoj ta ri utz chike roj y man yekatzi'ej ta ri ch'aka' chic. Tok c'o kajovabal, man yojquicot ta riq'uin ri etzelal ri quibanon ri ch'aka' chic vinaki', xa nikatij kak'ij richin nikamestaj ri etzelal ri'. Chuka' man nikaben ta ri utz richin chi xtiya'ox kak'ij. Xa yojquicot quiq'uin ri e banayon richin ri utz. Vi c'o kajovabal, man yekamalij ta can ri kachibil. Xa yekato' chupan ri quic'ayeval y nikacanoj chi niquiben ri utz. Tok can c'o vi kajovabal, re utzilej tak na'oj yec'oje' kiq'uin benek ruvech (tatz'eta' c'a ri 1 Corintios 13:4-8).

Ri Ajaf xuk'alajirisaj chikavech achique ri utz nikanojij chiquij ri ch'aka' chic vinaki' y achique ri utz nikaben quiqu'in. Rija' xuxutuj ri etzelal. Man riq'uin vi ri', ri Ajaf xrajo' ri aj mac stape' rubanon ri etzelal. Rija' xujoyovaj quivech ri tak ac'uala' y ri rijitek tak vinaki' y ri meba'i' y ri vinaki' ri c'o nic'atzin chique. Rija' janíla xerajo' ri ch'aka' chic. Romari' tok xuc'utuj chire ri Katata' chila' chicaj chi quercucuyu' ri achi'a' ri xquibajij chuvech ri cruz (tatz'eta' c'a ri Lucas 23:34). Ri Jesús xubij chi vi roj man yekacuy ta ri ch'aka' chic vinaki', ri Katata' chila' chicaj man xkojrucuy ta roj chuka' (tatz'eta' c'a ri Mateo 18:33-35). Quere' c'a xubij: "Jac'a yin ninbij chive, chi que'ivajo' ri ic'ulel, que'iturasaj ri yebin itzel tak tzij chivij, tibana' utzil chique ri ye'etzelan ivichin, y quixch'o ak'anij riq'uin ri Dios coma ri yeyok'on ivichin y ri yeyacatej pe chivij. . . .Vi ye'ivajo' ri ye'ajovan ivichin, ¿achique ivajel xtic'ul?" (Mateo 5:44,46). Nic'atzin chi yekajo' ri ch'aka' chic vinaki' achi'el xuben ri Jesucristo.

Tasiq'ujij c'a ri Moroni 7:45.

¿Achique camí na'oj niq'ik'alajirisaj chi c'o kajovabal?

¿Achique modo xquekajo' ri ch'aka' chic vinaki' stape' c'o quimac?

¿ACHIQUE MODO XTIKETAMAJ XQUEKALOK'OK'EJ RI CH'AKA' CHIC?

Nabey, nic'atzin chi nikatijoj ki' chire ruc'aslen ri Jesús y yekatakej ri rupixa'. Utz nikanabej achique xuben rija' tok xc'oje' chuvach'ulef. C'ari', nic'atzin chi nikaben achi'el ri xuben rija' (tatz'eta' c'a ri Moroni 8:25-26).

Ruca'n, tok nikanojij chi man nikajo' ta jun chic vinek, utz nikac'utuj chire ri Dios chi kojrufo' richin xtikaxutuj el ri nojibel ri'. Que c'are' nubij ri Moroni chike: ". . .tic'utuj c'a ak'anij chire ri Tata'ixel riq'uin ronojel ri ruchuk'a' ri iváni-ma richin xquixnoj riq'uin re ajovabel re' ri ruya'on can rija' chique checonojel ri kitzij tzelkelbenela' richin ri Jesucristo, ri Ruc'ajol'" (Moroni 7:48).

Rox, utz niketamaj nikajo' ki'. Ri Colonel xubij chi nic'atzin chi yekajo' ri ch'aka' chic vinaki' achi'el nikajo' ki' roj (Mateo 22:37-39). Nic'atzin chi nikajo' ki' y nikacukuba' kac'u'x riq'uin ri nikaben. Romari', nic'atzin chi nikanimaj ri utzilej rutzijol. Nic'atzin chuka' chi nitzolin pe kac'u'x chupan ronojel ri ketzelal. Tok xtzolin pe kac'u'x chupan ri

kamac c'o chi nikacuy ki'. Xaxe c'o modo richin nikajo' ki' tok kana'on chic pa kánima chi ri Ajaf can yojrajo' vi.

Rucaj, tok nikajo' ki', xtinimer ri kajovabal chique ri ch'aka' chic vinaki'. Chuka' man xtikanojij ta chi roj janíla oj utz chiquivech ri ch'aka' chic. Yekacoch' ri man utz ta quibanobal. Tok yojjel apon riq'uin ri Katata' c'o chila' chicaj, jari' tok ninimer ri karayibal richin nikajoyovaj quivech ri vinaki' ri yesachiyaj. Nuna' ri kánima chi nikarayij yekach'elej rije' y nikesesaj can ri quimac chiquij (tatz'eta' c'a ri *Enseñansas del Profeta José Smith* p. 292).

Chupan ri Vuj richin ri Mormon, niketamaj ri xuben jun ala' rubini'an Enos. Rija' xurayij xretamaj vi xecuyutej yan ri rumac o xa manek. Quere' nubij: "Xnum ri vánima y xixuque' chuvech ri Nutz'ucunel, y janíla xich'o el riq'uin rija' pa lok'olej ch'oven, y xinc'utuj pa ruvi' ri nuc'aslemal yin. Chijun k'ij xich'o el riq'uin rija'. Y tok xocok'a', ka, c'a xich'o na cof, richin chi xapon ri nuch'oven chicaj. C'a c'ari', xpe jun ch'abel viq'uin y quere' xubij: Enos, yecuyutej ri amac. Rat can xcaturusatej vi c'a" (Enos 4-5).

Ri Ajaf xubij chire ri Enos chi ri rumac xecuyutej roma cukul ruc'u'x riq'uin ri Cristo. Tok ri Enos xrac'axaj ri xubij ri Ajaf, man xumey ta chic ri' rija'. Xa xretamaj chi ri Ajaf nrajo' y xtiturusex na. Xuchop c'a ruch'obic quij ri rach'alal quibini'an Nefi'i'. Xch'o riq'uin ri Dios riq'uin ronojel ri ránima coma rije'. (tatz'eta' c'a ri Enos 7-9). Ri Ajaf xch'o riq'uin ri Enos y xubij chire chi xqueruturusaj vi rije' xtiqitakej chi utzil ri rupixa' ruya'on chique. C'ari', xnimer chic ri rajovabal ri Enos y can xutij vi ruk'ij richin xch'o riq'uin ri Ajaf pa quivi' ri Lamani'. Ri Lamani' xquetzelaj ri Enos y chuka' xequetzelaj ri ruvinak. Ri Ajaf xuya' pe chire ri Enos ri xuc'utuj y ri Enos xutij ruk'ij chijun ruc'aslen richin yerucol ri Nefi'i' y ri Lamani'. Ri Enos janíla xumatioxij roma ri Ajaf xrajo' rija' y xucuy ri rumac. Romari' tok xsamej chijun ruc'aslen chiquito'ic ch'aka' chic vinaki' richin niquil ri sipanic ri' chuka' (tatz'eta' c'a ri Enos 11-23). Ri Enos can xrajo' vi ri juley chic. Roj chuka' c'o modo richin nikaben queri'. Can nic'atzin vi chi queri' nikaben vi nikajo' nikichinaj ri c'ojlibel ri xunuc' ri Ajaf koma chupan ri rajavaren ri Tata'ixel.

Tasiq'uij c'a ruvech ri Moroni 8:25-26. Tasiq'uij c'a chuka' ri 2 Pedro 1:5-7.
¿Achique cami xtikaben richin xtilkil kajovabal?

CH'AKA' CHIC MOCAJ RI UTZ YE'ANIC'OJ

Colosenses 3:12-14 (ri ajovabel nic'atzin richin yojoc choj)

Alma 34:28 (ri Ajaf man xtuya' ta chike ri achique nikac'utuj chire vi man yekajo' ta ri ch'aka' chic)

1 Juan 3:16-24 (ri ajovabel jari' ri nikaben riq'uin jun ch'ajch'oj kánima)

1 Corintios 12:29-31. Chuka' ri 1 Corintios 13:1-3 (ri ajovabel, jari' nic'o ruvi' nim chiquivech ronojel ri ch'aka' chic sipanic richin ri Uxlabel)

2 Pedro 1:5-7 (nikaben jun utzilej na'oj pa ruvi' jun chic richin queri' xtilkil ri ajovabel)

Mateo 25:34-40 (ri rajel ri ajovabel)

DyC 121:45-46 (nic'atzin ri ajovabel vi nikajo' chi ri Uxlabixel yojrachibilaj)

RI BIX RI UTZ YE'ABIXAJ

"Ronojel Utz Nivachin"